

SOTA MAYKADWEN SOLAT NEN SAN PABLO PARA SO NONTA IRA I-KORINTO

¹ Si-kak si Pablo ja makasolat niyay et si Timoteo ja agi tayod pamati, si-katoy kadwák. Jet sajay ya solat, para son si-kayon kait ko ja toon Apo Shiyos ja wáred ta siyodad ni Korinto, tan shita intiron probinsiya ni Akaya. Itneng jo iya ikowan ko tep si-kak i sakey ya apostol nen Cristo Jesus, jet si Apo Shiyos i mismon enotok son si-kak.

² Say shawat ko, sapay koma ta kaasi-an shakejo nen Apo Shiyos, tan a-shoman to koma sota talna ja wára son si-kayo ja edapo met laeng son Apo Shiyos ja Ametayo, tan si Apo Jesucristo.

³ Man-iyaman kito ni olay so nen Apo Shiyos ja Ama nen Jesucristo ja Apo tayo. Si-katoy Ama ja manangaasi, tan si-katoy kedepo-i ni emin na tolong say eg kito medismaya.

⁴ Si-katoy kaontolong son si-katejo ni emin na digat tayo, say wára ngoy kedsang tayon ontolong so nonta ira kait tayon waray digat to. Jet say osalen tayon ontolong son si-kara, sota tolong met laeng ja edapo son Apo Shiyos ja wára son si-katejo.

⁵ No ebadeg i digat ja da-kaman tayo ja singa kitoka mekila-kam ni digat nen Cristo, ebadeg ngoy tolong to ja ipaay to son si-katejo.

⁶ Nem sota mika panda-kam ni digat, pan-sigshan jo, ta angken si-kayo, manda-kam kayo

ngo ni digat, jet no enosan jo, ja eg kayo medismaya, si-kayoy onda-kam met laeng nonta tolong to. Jet no anongosto ma, si-kayo met laeng i maysedakan. Sota intolong nen Apo Shiyos son si-kami ni inpandigat mi, singa si-katoy mengi-kan ni kedsangan ni pamatiyo.

⁷ Ebadeg i namnama mi ey idasat jon emin sota digat ja da-kaman jo, ta inon-an mi ey sota digat ja dina-kaman jo la, inges to ngoy digat mi; isonga amta mi ey si Apo Shiyos, ipaay to ngo ni olay i tolong to son si-kayo.

⁸ Si-kayon a-akik shi pamati, piyan min ipa-amta son si-kayo sota dina-kaman min digat shi probinsiya ni Asiya. Sotan na digat, embel-at ta pasiya ja singa eg mi itoled, jet angken biyag mi, dinamsis mi ma ja singa enshiy namnama min mebiyag pay laeng.

⁹ Mika dekna-a ey patey ma i panpa-no-an mi. Nem sajay i epasemak say eg kami manshinel shorog shi bakdang mi, no diket si Apo Shiyos bengat i panshingan mi. Ninemnem mi ey si-kato met ngoy onbiyag so ni nanketey, jet amta mi ey kabedinan ton memiyag son si-kami.

¹⁰ Jet siya, sotan na digat ja istay patey i toshongen mi, si Apo Shiyos i engisedakan son si-kami. Jet aliwen nontan bengat, no diket si-kato i kawad-an ni namnama mi ni olay jen si-katoy mengisedakan son si-kami.

¹¹ Nem mesepol la manshewat kayo son Apo Shiyos say ajowanan tokami. Jet no sotan i dag-en jo, ey eshakil kayon manshewat son Apo Shiyos ni pansigshan mi, eshakil ngoy man-iyaman son Apo Shiyos, ta sintilen to sotan

na eshakil la shawat jo.

¹² Marinel kami ey sotan i dag-en jo tep mapteng ni olay i inpasing mi son si-kayo. Saja nemnem mi, mika sigorado-a ey say mika pekikadwa shi emin na totoo, agdalo son si-kayo, si Apo Shiyos i engitoshong son si-kami. Isonga podno ni olay i pangkep mi. Jet sajay, aliwen na nemnem min dag-en, no diket kaasi nen Apo Shiyos. Jet sajay i mika pan-imdengi.

¹³⁻¹⁴ Saja insolat mi son si-kayo, enshiy polibas to: sota basa-en jon olog to, si-kato; enshiy eshom. Amtak ey waray eshom son si-kayo ja emansi-met tep si-kak ka mismo i engiranon son si-kayo ni esel nen Cristo, nem naka namnama-a ey no onsabi sota timpon idaw ali mowan nen Apo Jesus, pansimetan jowak ka emin. Jet angken si-kami ngo, pansimetan mikejo.

¹⁵ Ebadeg i namnamak ey si-kamiy joka pan-imdengi; isonga ninemnem kon si-kayo i pilmiron nak da bisita-en, say singa meminshowa ja mebindisiyonan kayo.

¹⁶ Ta ninemnem kon manshedan da son si-kayo ni idaw ko did ja Masidonia, jet kasta met no on-oli-ak den medepod jay, istay kowan ko ey manshedanak mowan son si-kayo, say asen joy ida-jat ko ja ondaw shi Jodia.

¹⁷ Amangan no kowan jo et ey emanbinaliw i nemnem ko, ja ekak nin ninemnem i pesing ko, tep ekak da etoloy. Enshi, aliwen inges ko sota eshom ma too ja kowan to ey owen, nem enshi gayam.

¹⁸ Si Apo Shiyos i emepiyal, ja maka-amta ni mika ikowan son si-kayo, jet saja mika ikowan,

aliwén emanbinaliw.

¹⁹ Si Jesucristo ja Anak nen Apo Shiyos, aliwén emanbinaliw i toro to, no diket sota kowan to, si-kato. Isonga sota naka pan-itoro, tan sota pan-itoro nen Silas nen Timoteo, ja maypangkep son Cristo, inges to ngon aliwén emanbinaliw.

²⁰ Ta emin sota kari nen Apo Shiyos nonta bayag da, si Cristo i timongpal so nontan na emin, ja si-katoy engowen so. Jet sotan i kabol la tayoka ikowani so ey “Siya Apo Jesus” no meksheng nga manshedjaw kito son Apo Shiyos.

²¹ Jet mesepol la nemnemen tayo ey si Apo Shiyos sa mismo i emengi-kan ni kedsang ni pamati tayo son Cristo jet si-kato met laeng i shimotok son si-katejo.

²² Jet inpan-iyen to sota Ispirito Santo to son si-katejo say sotan i amta-an tayo so ey sigoradon kokowa shakito ma nen Apo Shiyos, tep singa sota Ispirito Santo to i inmalka to son si-katejo.

²³ Saja naka pan-ikowan pay laeng, sota maypangkep ni ekak da nin dinawan son si-kayo. Si Apo Shiyos, amta to i wared nemnem ko, ja ekak man-o-owap. Say kabol la ekak da dinawan na shagos son si-kayo, ekak koston bigla-an takejon sekitan ni pemidin ko son si-kayo.

²⁴ Eg jo koma nemnemen ey nayda-kad i nak pemidin son si-kayo. Enshi, no diket mikejoka pantodongi say man-imdeng kayo. Eg mesepol la itorayan takejon pasiya ta kosto met i pamatiyo.

2

¹ Nonta indaw ko la son si-kayo ni pinsak, sinekitan koy nemnem jo jet angken si-kak ngo,

nandaringitak. Isonga ekak da etoloy, ta ekak koston mesekitan mowan i nemnem jo.

² Ekak koston pandeshingit takejo mowan, ta enshi met i eshom ma mengi-kan ni pan-imdengan ko nem eg si-kayo bengat.

³ Nansolatak et ngo mowan son si-kayo tep piyan kon mesenok ka mebidin sota kait jon nanbasol, say no bilang ey metodoyak da, eg mesekitan i nemnem ko kabol son si-kayon istay mengi-kan koma ni pan-imdengan ko. Naka namnama-a ey sota pan-imdengan ko, pan-imdengan jo ngo.

⁴ Nansolatak da nontan tep piyan kon amta-en jo koma ey ebadeg i semek ko son si-kayo; aliwén kowan ko ey say mandeshingit kayo. Agpayso, nonta insolat ko sota pemidin jo ni nanbasol la kait jo, ekak maynemneman, naka emankaisaysay-i pay.

⁵ Agpayso, aliwén si-kak i engi-kan ni daringit jo, nem eg sota kait jon nanbasol met laeng, si-katoy engi-kan ni nandaringitan ni eshom son si-kayo. Aliwén si-kak i nanbasolan to, no diket singa si-kayo met laeng. Nem say wáred nemnem ko, ekak koston ida-karan sotan;

⁶ isonga on-anay sota inpasing jon emilin so nonta nanbasol la too. Kosto sota inpasing jon engibiyang nin son si-kato,

⁷ nem niman mesepol la pakawaniyo et, jet atngiyo ma ni pansigshan to, say eg medismaya; nakol ni ebaken ni ebadeg ga daringit to et ngo mowan.

⁸ Jet kekshawen ko son si-kayo, ey ipa-sas joy semek jo pay laeng son si-kato.

⁹ Sajay i kabol la insolatan ko so nontan na solat, ta piyan kon peshasen takejo, no pati-en jo met laeng i ikowan ko son si-kayo.

¹⁰ Siya, no pekawanan jo sotan na too — ono sota eshom ma toon nanbasol — pekawanan ko ngo ira. Nem no bilang ey waray pinekawanan ko shita kad-an jo, dingkak sotan tep pansigshan jo met laeng, jet sotan i ka-aporbalin Cristo.

¹¹ Sajay i inpasing ko ja emakawan say eg ewisen nen Satanas sota kait tayo, ta amta tayo met i pangkep nen Satanas ja meneshal ni too.

Embel-at iya epateg ga obda mi, nem kabaalan mi

¹² Nonta indaw ko shi siyodad ni Troas kabol ni nak pengitosho nonta mapteng nga shamag pangkep son Cristo, eshakil i masi-met ja mengit-neng nonta naka pan-itoro maypangkep so nen Apo Jesus.

¹³ Nem ekak maynemneman nontan, ta si Tito, ja agik shi pamati, eg nay-aspol shiman ni inkalapo to did ta kad-an jo. Isonga indekjas ko sotan na dogad jet dimawak shi Masidonia say nak sebi-en shiman tep piyan kon pasiya ja amta-en son si-kato i kasesaad jo.

¹⁴ Nem naka man-iyaman son Apo Shiyos ta si-katoy emengitoshong son si-katejo angken toway dawán tayo, ni tayoka pansilbi son Cristo. Isonga eg kito ma-ebak. Jet si-kato met laeng i emengitoshong son si-katejo ja mengikowan so ni eshom shi emin na dogad nonta mapteng nga shamag maypangkep so nen Cristo. Singa

may-eshig ey emanseng-ew sota maypangkep son Cristo, jet emansengaw shi intiron dobong.

¹⁵⁻¹⁶ Si-katejon emengikowan ni maypangkep son Cristo, may-eshig ey kitoka mengiweshis nontan na emanseng-ew so nonta ira angken sipen too. Sota ira emantoshong shi kaysedakan, shaka ekoba et piyan sha tep mengi-kan ni biyag son si-kara. Nem sota ira emantoshong shi keshosa-an sha, shaka ngo ekoba nem ngaaw sha et metodoy iren manda-kam ni shosa. Sajay ya obda tayon mengikowan ni maypangkep son Cristo, ebadeg ga pasiya, singa eg mayposi, jet manmanoy kaonbaal so.

¹⁷ Nem si-kami, mebedin mi, ta aliwen inges mi ira sota eshom ma shaka panpidaki sota esel nen Apo Shiyos. No ikowan mi sota esel nen Apo Shiyos, eg kami man-olbod tep mika nem-nemnema ey si Apo Shiyos i emili son si-kami ja mengikowan maypangkep so nen Cristo, jet tokamika os-osshongi.

3

¹ Istay kowan jo emo ey mika pan-isagot shorog i bakdang mi son si-kayo. Nem enshi! Apay mesepol la isolat mi aya i maypangkep son si-kami shorog? Ono mesepol aya i solat ni eshom ja mengisekot son si-kami asan jokami awata? Sotan i kepesing ni eshom asan shakejoka awisa shi piyan sha. Nem si-kami, am-amtayon sigod.

² Si-kayo shorog i may-eshig ey solat ja mengisekot son si-kami, jet mebedin na basa-en

ni emin na totoo i semek mi son si-kayo tan semek jo ngo son si-kami.

³ Edawag ey si-kayoy may-eshig ey solat ja edapo son Cristo ja basa-en ni totoo, jet si-kamiy singa mismon engisodat. Nem sajay ya solat, aliwén inges to sota naysolat ni tinta, no diket singa say inpangisolat mi, sota Ispirito Santo nen Apo Shiyos ja sibibiyag ja wáred poso jo; isonga aliwén inges to sota solat ja nayko-nit shi bato.

⁴ Kamika menigorado niyay, ta say mika pan-shindi, si Apo Shiyos pangkep so nen Cristo.

⁵ Angken nganto, enshiy mi ikowan ey kabaalan mi no enshis Apo Shiyos son si-kami. Ta si-katoy emengi-kan ni emin na kedsang mi ja ondaga so niyay ya obda.

⁶ Jet si-kato met laeng i engikowan ey si-kami i mengitoshononta badon bilin to so ni totoo. Aliwén inges to sota sigod ja bilin ton naysolat nonta bayag da, no diket sota Ispirito Santo to i mismon inpan-iyen to so ni totoo. Jet sota Ispirito Santo, si-katoy emengi-kan ni biyag ingkatod ingka. Nem sota bilin ja naysolat nonta bayag, apil ngo, ta singa ememono ingkatod ingka.

⁷ Sota bilin nen Apo Shiyos ja naysolat nonta bayag da shi bato, nonta in-awat nen Moises so nonta ira totoo, inpa-sas nen Apo Shiyos i panakabalin to. Nontan, kaskasshaaw i inpasing to, ta emenenilin pasiya i dopa nen Moises. Jet eg itoled ira nonta too ja isi-ning si Moises. Angken nonta emanka-kal mala sota emenenilid dopa to, eg ngoreshan itoled nonta ira totoo ja isi-ning si-kato. Kaskasshaaw iyay ya epasemak nonta

in-awat nen Moises sota bilin nontan da, angken sotan na in-awat to ket, eg mengi-kan ni biyag ingkatod ingka.

⁸ No sotan i panakabalin nen Apo Shiyos ja maytakshol son Moises, mas ebadbadeg pay i panakabalin nen Apo Shiyos ja maytakshol son si-kami, ta kamika mengitosho nonta badon bilin to, ja sota on-awat so, ma-aknan ni Ispirito Santo to.

⁹ Kaskasshaaw i edaga so nen Moises nontan jet say in-awat to bengat, sota bilin ja singa engi-kan ni keshosa-an ni totoo. Nem mas pay ya kaskasshaaw wa pasiya i medeka niman, ta kamika mengitosho ni koston pesing ni too say kosto-an nen Apo Shiyos.

¹⁰ Mebedin na ikowan tayo ey sota pilmiron bilin da ja istay ya etaksholan ni panakabalin nen Apo Shiyos, enshi mala niman i panakabalin to. Tep sota badon bilin nen Apo Shiyos, ebadeg i panakabalin to; jet si-katoy naysa-dat ma.

¹¹ Sota epangdo la ja bilin, etaksholan na agpayso ni panakabalin, nem sankatikan bengat. Nem sota naysa-dat niman, wára ni olay ingkatod ingka. Isonga ebadeg pay i panakabalin to.

¹² Jet niman, ta wára iyay ya namnama mi, marinel kamin mengikowan ni koskosto;

¹³ aliwén inges mis Moises ja inbaing to sota pankakali nonta emenenili shi dopa to nonta bayag da. Tina-bonan toy dopa to, say sota ira kait to, eg sha idasin i pankakali nonta emenenili.

¹⁴ Nem si-kami, angken diritsoy mika pen-

gitosho, sota nemnem ira nonta Hodiyo, timangken ingkato niman. Jet no basa-en sha sotan na epangdon bilin nen Apo Shiyos, may-eshig ey ka-onong pay laeng sota ta-bon sha ja simekdin say eg sha ewatan sota olog to, ta eg sha pinati si Cristo. Si Cristo bengat i mebedin na mengkal nonta singa simekdin say edawag ma i olog to.

¹⁵ Angken niman na timpo, no ibasara sota bilin nen Apo Shiyos ja naysolat nonta bayag da ja in-awat nen Moises, singa wara pay laeng sota simekdin, ta eg ewatan nonta mengitneng.

¹⁶ Nem no si Apo Jesus i toshongen ni too, ewatan sha ma ja singa ma-kal sota singa simekdin.

¹⁷ Ta si Cristo ja toshongen ni too, si-katoy emengi-kan ni Ispirito Santo, jet sota toon kawad-an ni Ispirito Santo, ewaya ma.

¹⁸ Jet emin kiton emati son Cristo, aliwen inges tayos Moises ja sina-dinan toy dopa to, ta si-katejo, singa ispiko kito ja emengipa-sas nonta itsora nen Apo Jesus. Niman ma, waray ootik ka nay-ingesan tayo son Apo Shiyos, nem emanka-shomi ni olay, jet no ekay ingesen tayo ma si Apo Jesus, ta si-katoy emengi-kan ni Ispirito Santo.

4

¹ Si Apo Shiyos, kinaasi-an tokami jet si-katoy engipedaw son si-kami ni sajay ya obda. Isonga eg kami medismaya.

² Sajay ya obda min mengitosho, enshiy kabebaing ja mika dagdag-a, ono na-alas sa

aramid min mika i-em-emot. Aliwén mika pan-olbora i too say memati ira. Say mika pan-itoro, sota podpodnon kowan ni esel nen Apo Shiyos, aliwén mika pansa-dati ono mika pan-a-shomi. Sajay, amta nen Apo Shiyos et sajay bengat i mika pesing nga mengisekot ni bakdang mi shorog so ni totoo, say nemnemen sha ey mapteng kamin too.

³ Nem angken diritsoy mika pengitoshon, wára pay laeng i eg maka-awat, nem sotan ira sota toon emantoshong shi keshosa-an sha.

⁴ Sota kepatpati-a ira niya eg emati son Cristo ja si Satanas, si-katoy singa simekdin so ni nem-nem sha say eg sha ewátan sota mapteng nga shamag pangkep son Cristo, say eg medewágan i nemnem sha. Si Cristo, ja engipa-sas ali ni itsora nen Apo Shiyos,

⁵ si-katoy etopog ga mika pan-itoro; aliwén sota maypangkep ni bakdang mi. Mika ikowan ey si Jesucristo, Apo tayon emin. Jet say mika ikowan bengat pangkep ni bakdang mi shorog, kowan mi ey inbaba miy bakdang min mandeka ni pansigshan jo, ta ensemek mis Jesus.

⁶ Ta si Apo Shiyos, inkowan to ngo eshan nonta pinalsowa toy dobong ey sota embolinet, mesepol la mesilwan. Jet si-kato met laeng i singa enilew ni nemnem tayo, say amta-en tayo i maypangkep so nen si-kato, jey si-katoy Kangeto-an. Jet no si Cristoy nemnemen tayo, singa emesilwiý nemnem tayo.

⁷ Jet sajay ya obden inpiyal nen Apo Shiyos son si-kami, epateg ga pasiya; nem too kami bengat. May-eshig ey intalo nen Apo Shiyos sota ebanol

shi banga ja emebowey. Sajay i inpasing to say eg mi nemnemen ey si-kami shorog i makabalin ja ondaga so niyay ya ebadeg ga obden mika dagdag-a, no diket si-kato.

⁸ Eshakel la digat ni olay i mika da-da-kami, nem mika idasat; mandikat ta pasiyay nemnem mi no sina-shom, nem eg ngo eshan ma-kal i namnama mi.

⁹ Eshakel i makakontra son si-kami, nem eg kami ma-enshi-an ni kajem; inteltel shakami pay shi bo-day, nem eg mi inna-jon na etey.

¹⁰⁻¹¹ Kanajon na waray digat ja mika da-da-kami, jet sotan na digat, singa in-inges sha nodta dina-kaman nen Jesus nonta shanshani men bono-en sha. Dilikaro i kasesaad ni biyag mi ni olay kabol ni mika pansilbi so nen Jesus. Jet sajay i emedegdeka son si-kami niman, say no asdeg toy dag-en mi pangkep ni mika pengitosho, amta-en ma ni totoo ey angken niman, wara si Jesus shi biyag ja kaontoltolong son si-kami.

¹² Isonga no patey i emansessesked son si-kami, pansigshan jo, tep biyag ngoy emansessesked son si-kayo.

¹³ Say kowan nonta naysolat nonta bayag da, kowan to ey, "Naka memati son Apo Shiyos, isonga wara ngoy naka ikowan." Jet sota engikowan niyay, tan si-kami, saksakey i pinati mi, isonga wara ngoy mika ikowan.

¹⁴ Ta amta mi ey si Apo Shiyos ja inpan-ongal so nen Apo Jesus, panbiyag shakami ngo, ta wara kami son Jesus. Jet angken si-kayo ngo. Isonga no anongosto, man-o-odop kito, si-katejod Cristo, ja ondaw son Apo Shiyos.

¹⁵ Emin iyay, pansigshan jo. Ta sota ebadeg ga kaasi nen Apo Shiyos son si-kami, singa emanba-deg pay tep eshakil kayon emanshewat son Apo Shiyos ni pansigshan mi, jet eshakil ngoy eman-iyaman ja emengiredjaw son Apo Shiyos.

¹⁶ Isonga eg kami medismaya. Angken na saja bakdang mi ket emankepoy, saja nemnem mi, kebedo-i nen Apo Shiyos ni olay.

¹⁷ Jet sajay ya ootik ka digat ja sankatikan, si-kato iya mika da-da-kami, nem say panpa-no-an to shi ka-onoran, sota ebadeg ga sobadit ja i-akan nen Apo Shiyos ingkatod ingka, ja enshiy to kay-ingesan.

¹⁸ Isonga aliwen sota ma-sas niman na banag i mika nemnemnema, no diket sota banag ja eg pay laeng ma-sas niman. Ta sota ma-sas niman, maganon ma-enshi; nem sota eg ma-sas ja kedagdag-a nen Apo Shiyos, si-kato ngo eshan i wara ni olay ingkatod ingka.

5

¹ Amta tayo met ey saja bakdang tayo, ja may-eshig ey kampo ja tayoka pan-iyani ni sankatikan, mesheshal ngo eshan. Nem wara i dingka nen Apo Shiyos ja koston pan-iyanan shi naykayang ja aliwen dingka ni too. Sajay, eg mesheshal, wara ni olay ingkatod ingka.

² Shiya dobong, singa kitoka man-ingag ni digat tayo; isonga kitoka man-a-agag ga pasiya ja no mebedin, ondaw kito ma shi dangit ja kawad-an ni koston pan-inan.

³ Sotan may osalen tayo say aliwén na may-eshig ey dabos kito.

⁴ Niman na kawasha tayod ja bakdang tayo, ja may-eshig ey kampo ja tayoka pan-iyani, singa kitejoka mannged-as ta edigat i biyag shiyay. Nem aliwén say piyan tayo, maydekjas iya bakdang tayo niman, ta nakol ni singa dabos kiton enshi may pan-inan. Say piyan tayo, mayta-kep koma sota bado, ta si-katoy pilmi, jet say saja bakdang tayo niman na emetey, mesa-datan na kolpi ni biyag ja wára ni olay ingkatod ingka.

⁵ Esagana kiton ma-aknan niyay ta si Apo Shiyos met laeng i engisedakan son si-katejo. Jet sota Ispirito Santo to ja wára son si-katejo, si-katoy penigorado-an tayo ey tongpalen to di.

⁶ Isonga eg kito medismaya, makedsang ni olay i namnama tayo, no pay arawi kito nin son Cristo. Amta tayo ey no wára kito pay laeng shiya bakdang tayo, ja wára kito pay laeng shi biyag, enshi kito nin shima koston pan-inan.

⁷ Ta shiyay, kitoka memati bengat son Cristo; eg tayo nin inon-an.

⁸ Nem makedsang i namnama tayo, jet say piyan tayo, angken maydekjas iya bakdang tayo say on-akad shima kad-an nen Apo Jesus.

⁹ Isonga say wáred nemnem tayo, angken niman na wára kitod jay, ono shiman da, piyan tayon sota pan-imdengan nen Apo Shiyos i dag-en tayo.

¹⁰ Ta emin kito, onsango kito so nen Cristo, jet bisna-en toy dingdingka tayo nonta kawasha tayod biyag shiya dobong, no mapteng ono

ngaaw, jet ewaten tayoy sobadit nonta dingka tayoy.

¹¹ Amta mi ey si Apo Jesus, si-katoy mesepol la metekotan; isonga mika ad-adokay toon memati nonta kowan mi. Jet si Apo Shiyos, amta to ey enshiy ngaaw wa pangkep mi; naka pay namnama-a ey angken si-kayo, amtayo ngo.

¹² Nem baka kowan jo ey mika pan-isagot mowan i bakdang mi shorog son si-kayo. Enshi. Kina-agpayso to, piyan min ipa-amta son si-kayo iyay, say wára ngoy ikowan jon mapteng nga itsora mi so nodta totoo tan ja say shaka shed-jawa ket sota toon mengipa-sas ni nandasinan tod eshom, aliwen sota toon podnon mapteng i wáred nemnem to.

¹³ Jet no bilang ey kowan sha ey edabas i mika pesing, ja singa kamika man-engaw, mebedin; nem dingka mi sotan maypangkep so nen Apo Shiyos. Nem niman, no koskosto iyay ya mika pan-ikowan son si-kayo, ja aliwen edabas, pansigshan jo met laeng.

¹⁴⁻¹⁵ Sota semek nen Cristoy emengitoshong son si-kami, isonga aliwen bakdang mi bengat i mika nemnemema, angken ngarantoy dag-en mi. Ebadeg i semek to son si-katejo, isonga etey para so ni emin na totoo. Isonga mika kowinta-a ey singa etey kiton emin et no sotan, eg mi nemnemen i pansigshan mi shorog. Jet aliwen si-kami bengat, no diket si-katejon emin ja wára pay laeng shi biyag, aliwen tayo nemnemen ma i pansigshan tayo shorog, no diket si Cristo i nemnemen tayo, ta etey maypangkep ni pansigshan tayo, nem nan-ongal met laeng.

¹⁶ Isonga say kowan mi, no kowinta ey etey i totoo, eg mi ma ibilang i kasesaad ni angken sipen too shiya dobong. Angken si Cristo, kowan mi nem too bengat nontan da, nem niman aliwen sotan ma i wared nemnem mi pangkep son si-kato.

¹⁷ Jet angken sipen too ja memati so nen Cristo, mebediwan i wared nemnem to; singa badon palsowa ma. Sota sigod ja ogadin ngaaw, enshi mala, jet sota bado, si-katoy naysa-dat ma.

¹⁸ Jet emin iyay, si Apo Shiyos i dimaga so, ta si-kato met laeng i engawat son si-katejo pangkep nonta inkatey nen Cristo, jet in-esop shakito met laeng son si-kato say dag-en tayo may piyan to. Jet say piyan to ngon dag-en min apostol, itod-an miy eshom ma totoo say may-a-sop ngo ira son si-kato.

¹⁹ Say olog nonta inkowan ko la, nonta etey si Cristo, si Apo Shiyos, toka pandag-a i pesing ton mengi-sop met laeng so ni emin na totoo son si-kato, say eg to ma ibilang sota ngaaw den aramid sha. Jet sajay i inpiyal ton itoro mi.

²⁰ Shinotokan shakami nen Apo Shiyos ja mengi-edagey son Cristo, isonga no mengadok kami ni too, aliwen nemnem mi ni abos, no diket nemnem nen Apo Shiyos sota mika pan-i-adok. Isonga shewaten mi ngarod son si-kayo kabol so nen Cristo ey ipalobos jon i-esop shakejo nen Apo Shiyos son si-kato met laeng.

²¹ Si Cristo, enshin polos i ngaaw wa aramid to, nem si Apo Shiyos, inkowan to ey si-kato et ngo mowan i mengikesho nonta basol tayon totoo, say no memati kito son si-kato, ibilang shakito

ma nen Apo Shiyos ey mapteng kito, ja inges ni ogadi tayoy ogadi to met laeng.

6

¹ Sajay ya obda, mika pan-atngi si Apo Shiyos ni obda to; isonga iyay i kekshawen mi son si-kayo. Niman na kinaasi-an shakejo nen Apo Shiyos, osal jod pansigshan jo, karejo pekewas sota inkaasi to.

² Alisto-iyon mengosal niyay ya kaasi. Nem-nem jo kari sota inkowan nen Apo Shiyos ja naysolat nonta bayag da ja kowan to ey, “Nonta simabi sota koston timpo, kinaasi-an takejo, tin-odongan takejo, say maysedakan kayo.” Kowan nonta padto, jet marama ma niman sota inpadto ton timpon kaysedakan; isonga awat jo et ma.

³ Enshiy mika dag-a ja bedawan shakami so ni eshom, ta eg mi kosto ja ikowan sha ey ngaaw iya obda mi.

⁴ Say mika dagdag-a et ngo mowan, angken nganton banag, mika ipa-sas ey si Apo Shiyos i mika pansilsilbi-i; isonga angken nganton digat, mika itoled.

⁵ Jet iyay i eshom ma digat ja dina-kaman mi. Dina-kaman miy sepdar, dina-kaman miy balod, dina-kaman mi pay i bonget ni eshakel la totoo. Kamika emebdey ni obda, eg kami pay maka-ogip ni medebi no sin-arom, tan dina-kaman mi pay i agang.

⁶ Jet say mika pesing pay ja mengipa-sas ey si Apo Shiyos i mika pansilsilbi-i, poro mapteng i pangkep mi, mika pan-itoro sota inpa-amta nen Apo Shiyos son si-kami, na-anos kami pay

ja mika todongiy kait min too. Mika ipa-sas ni olay ey sota Ispirito Santo nen Apo Shiyos i emengitoshong son si-kami, jet wáray podnon semek mi shi eshom.

⁷ Sota koskosto, si-katoy mika ikowan, jet say sakey pay, edawag ey sota panakabalin nen Apo Shiyos i ka-ontolong son si-kami. Singa say mika osala ja mekisengo so nonta ira eg makakosto ni mika itoro, saja mapteng nga ogadi mi; jet sajay, kaon-anay, enshiy kolang to.

⁸ Sota ira eshom, inshayaw shakami, jet sota ira eshom, binedaw shakami. Sota ira eshom, kowan sha ey ngaaw kami, nem sota ngo ira eshom, kowan sha ey mapteng kami. Nem enshi met i ngaaw wa dingka min kabol ja shakami so bedawan. Agpayso i mika ikowan, nem kowan ni eshom kono ey ma-owap kami.

⁹ Sota karakdan na too, eg shakami am-amta, nem si Apo Shiyos, tan sota ira too to, amtara kami. Inbilang shakami ni karakdan ey etey kami, nem wára kami pay laeng met shi biyag. Pinedigat shakami, nem eg kami ebono met laeng.

¹⁰ Kamika emandeshingit, nem wára met laeng ni olay i indeng mi; ebiteg kami, nem eshakil met i singa in-pabaknang mi; enshin polos i kokowa mi, nem singa in-akan nen Apo Shiyos son si-kami i emin na wáray banol to.

¹¹ A-akik shi pamati ja i-Korinto, indiritso min inkowan iyay ya dekna mi. Say agpayso, ebadeg i semek mi son si-kayo.

¹² Enshiy ngaaw wa wáred nemnem mi pangkep son si-kayo, nem si-kayoy eg makakosto

son si-kami.

¹³ Saja naka pan-ikowan son si-kayo, takejoka ikari ey singa annak takejo; isonga angken si-kayo ngo, semek jokami ngo koma.

Pantanshaan kayo tep baka onoran jo et sota totoon enshiy pamati to son Apo Shiyos

¹⁴ Karejo ikadwa shorog i bakdang jo so nonta ira eg emati tep eg kayo mankinompasan. Say arig to, sota baken nanparis sa mengojod ja eg nan-inges i kedsang sha. Enshi met i naykamitan ni toon mapteng so nodta toon naykontra son Apo Shiyos i aramid to; jet enshi met laeng i naykaitan ni toon edawagan i nemnem to so nodta toon eg edawagan i nemnem to.

¹⁵ Apay mankompas aya i ogadin Cristo tan si Satanas? Enshi met. Jet angken ngon si-katejon emati son Cristo, eg nay-inges i nemnem tayo nodta wared nemnem ni eg emati.

¹⁶ Si-katejo i may-eshig ey Timplo nen Apo Shiyos et na-alas no ikadwa i Timplo nen Apo Shiyos nodta inemag ni toon sinan shiyos. Ta si Apo Shiyos, wared biyag. Isonga wara sota naysolat nonta bayag ja esel to, ja kowan to ey, "Panbedin ko ira ja may-eshig ey baley ko et man-iyanak son si-kara say wara-ak ni olay son si-kara. Jet si-kak ma i metopog ga Shiyos sha et si-kara ngo ma i took."

¹⁷ Jet kowan to pay ey, "Isonga ilesin joy bakdang jo et karekayo mekibiyang ma so nodta kedagdag-a nonta ira toon enshiy Shiyos to. Bay-iyo sotan na ngaaw wa aramid sha, say ewaten takejo.

¹⁸ No sotan i dag-en jo, si-kak ma i Amejo, jet si-kayo i annak kon daleki, tan annak kon bibii.” Sajay i kowan nen Apo Shiyos ja Manakabalin.

7

¹ Si-kayon a-akik shi pamati, emin ira jay ya kari nen Apo Shiyos, si-katejoy inkari-an to so. Isonga mesepol la niman ma, ibi-jag tayo sota ngaaw wa aramid ja singa emengi-kan ni dogit ni bakdang tayo tan nemnem tayo, jet say nemnemen tayo ma, si Apo Shiyos. Si-kato pay i mesepol la tekotan tayo, say may-inges kito nodta ogadi to.

Sota epangdon solat ko, inpandaringit takejo, nem mapteng ngoy nanpa-no-an to

² Say kowan ko, semek jokami ngo, ta amta mi ey enshi met i ngaaw wa mi dingka so ni angken sakey son si-kayo; enshi met i mi shineshal son si-kayo, ono mi pinidiw i kokowa to son si-kayo.

³ Baka ipangkep jo ey waray piyan kon pebesolan son si-kayo; enshi! Amtayo met i inkowan ko la son si-kayo ey wara kayo ni olay shi nemnem mi. Jet angken bilang ey metey kami, ono wara kamid biyag, si-kayo pay laeng i mika nemnemnema.

⁴ Ebadeg i namnamak pangkep son si-kayo, jet ebadeg pay i naka pengiredjaw son si-kayo. Si-kayo met i emengi-kan ni kedsang ko. Angken naka medigdikati, ebadeg ngo eshan i imdeng ko.

⁵ Nonta mimotok kamid ja Masidonia, emandikat ni olay i nemnem mi, enshiy salsheng mi. Angken townen dogad shiyay ja dinawan mi,

waray kolo. Shakamika panbekala, jet entakot kami.

⁶ Nem si Apo Shiyos, si-katoy emengi-kan ni kedsang so nonta toon emedismaya, jet siya, angken si-kami inpakedsang shakami nonta mi-motok ali si Tito son si-kami.

⁷ Ta say inkowan to nonta inmotok to, inpakedsang joy nemnem to nonta wared ta kadnan jo. Jet nay-imdenganak ngon pasiya, ta inkowan to ey piyan jo konon asen jowak ngo, asan inkowan to pay ey kayoka mandeshingit maypangkep nonta epasemek nontan da, jet esagana kayo men mengonod nonta piyan kon medeka.

⁸ Ta amtak ey sota solat ko la, inpandaringit tokejo, nem aliwen naka manbebawi ja engisodat nontan da son si-kayo. Singa istay naka manbebawi nonta insolat ko la son si-kayo ta nandaringit kayo ni in-awat jo so, nem sankatikan bengat i inpandaringit jo.

⁹ Jet niman, naka ma man-imdeng. Aliwen sota inpandaringit jo i naka pan-imdengi, no diket sota nanbanagan ni daringit jo, ta nanbebawi kayo nonta ngaaw wa aramid jo. Isonga nanmaptengan jo met laeng sota inpansolat ko son si-kayo, eg kayo nayda-karan. Sotan na itsora ni pandeshingit ni totoo, si-katoy piyan nen Apo Shiyos,

¹⁰ ta si-katoy toka osala ja panbebawi so ni too. Kowinta ey sotan, emengi-kan ni kaysedakan ni totoo, isonga eg kito manbebawi no sotan i itsoren pandeshingit ni too. Nem apil i panpa-no-an ni daringit ni tood ja dobong ja eg emati, ta singa toka ira pan-itorong shi patey

ingkatod ingka.

¹¹ Nemnem jo kari sota mapteng nga nanpa-no-an ni inpandaringit jo. Niman ma, kabol ni inpandaringit jo, alisto kayo men memidin ni kait jon manbesol, mapiyan kayo pay ya mengipedawag ni koskoston nanbaliwan jo, singa sinodngan jo shorog i bakdang jon inbonget pangkep nonta nanbasol ja kait jo, tan wara pay gayam i takot jo son si-kak. Nem piyan jo met laeng nga asen jowak, tan masi-met kayo ma ja mengonod nonta kowan ko. Siya, binidin jon kosto sota kait jon waray basol to, jet niman, enshi may basol jo pangkep nontan na banag, ta dingkayo met i kosto.

¹² Jet angken na insolat ko sotan son si-kayo, aliwa bengat ja say bidinen jon kosto sota ngaaw wa aramid to, ono say isingpet jo sota toon nanbasol. No diket say epateg ga nansolatan ko, piyan kon say maynemneman kayo, tan say ipa-sas jo ey si-kami met laeng i joka pati-a, aliwen sota eshom. Jet sajay ya insolat ko, aliwen pampamaayan, ta si Apo Shiyos, shakamika pan-osshongi ni inpansolat ko.

¹³ Sajay ya inpasing jo, inpakedsang to mowan i nemnem mi, jet kamika pay man-imdeng nga pasiya so nen Tito, ta eman-imdeng ngo ni inmotok to did jay. Jet si-kayon emin konoy inpaka-jas so ni nemnem to.

¹⁴ Kamika man-imdeng ta inamta-an nen Tito ey nay-agpayso sota inkowan ko nontan son si-kato pangkep son si-kayo, tep sinintil jo la nonta indaw to led ta kad-an jo. Isonga mapteng i deknak, ta nay-agpayso sota inpangi-tek ko son

si-kayo so nen Tito, ja inges to sota emin na inkowan mi son si-kayo ket, nay-agpayso.

¹⁵ Jet niman ma, na-shoman men pasiya sota semek to son si-kayo. Ta eg to dibkan sota mapteng nga dingkayo son si-kato, ja joka pati-en emin sota inkowan to. Tan sakey pay ya eg to dibkan, kowan to ey singa kayoka man-anad kono son si-kato ni inmotok to, ta eg jo amtay pesing to son si-kayo.

¹⁶ Jet niman ma, naka man-imdeng ta in-
amta-an ko ey siya, kayoka emepiyal.

8

Itodoy jo sota plano jon ontolong so nonta ira i-Jodia ja maligdigat

¹ Si-kayon a-akik shi pamati, piyan min amta-en jo ey si Apo Shiyos, asdeg ton kinaasi-an to ira sota emati son Cristo shiya intiron Masidonia.

² Asdeg toy digat ja dina-kaman sha, nem ireka pay laeng man-imdeng nga pasiya ja ontolong, angken na si-kara ket enshiy kabedinan sha.

³⁻⁴ Kinshaw sha son si-kami ey piyan shen pasiya ja ontolong ni kasapolan ira nonta emati ja i-Jodia ja maligdigat. Jet say inpasing shen engi-kan ni alos sha, aliwen sota kabaalan sha bengat i in-akan sha, no diket sinodokan sha pay. Inon-an ko ey masi-met iren ondaga so niyay, enshiy emilit son si-kara.

⁵ Eg mi namnama-en ey sotan i dag-en sha. Nem say inpasing sha nin, ninemnem sha ngo shorog ey i-akan shay bakdang shen mansilbi

son Apo Jesus tan mansilbi son si-kami, ta inewatan sha ey sotan i piyan nen Apo Shiyos sa dag-en sha.

⁶ Isonga shinewat mi so nen Tito ey itoloy to sota inshogi tod tan, say meksheng ngoy itolong jo.

⁷ Joka singpeten emin i joka dagdag-a. No maypangkep ni pamati, ebadeg i pamatiyo, asdeg toy daing jon mengitosho, tan asdeg toy amtayo pay. Masi-met kayon ontolong so ni eshom, tan ebadeg pay i semek jo son si-kami. Isonga no maypangkep ni sajay ya obden penodong ni kait tayod Jodia, piyan min singpeten jo iyay ya dag-en.

⁸ Aliwen kowan ko ey pilit ja onoren jo iya naka pan-ikowan shiya solat ko, no diket piyan kon pa-amta son si-kayo ey eshakil i masi-met ja ontolong, ket no onoran jo ngo ira, mepati ma ey aliwen pampamaayan i semek jo.

⁹ Eg mesepol la piditen takejo ta amtayo met sota maypangkep ni kaasi nen Jesucristo ja Apo tayo. Si-kato, baknang nontan da shi dangit, nem inbaba toy bakdang to ja nanbalin ni ebiteg kabol ni pansigshan jo. Jet niman ma, si-kayoy may-eshig ey baknang.

¹⁰ Jet ikowan ko son si-kayo iya wared nem-nem ko. Mapmapteng no itoloy jon kekshengen sota inshogi jon alos nonta sakey den tawen. Ta masi-met kayo nontan ja ondaga so niyay,

¹¹ jet niman, itodoy jon kekshengen, say may-enam nodta ogadiyon mapiyan ja ontolong. Sota kabaalan jon i-akan ja itolong, si-kato,

¹² ta no mapiyan kayon mengi-kan ni tolong, si Apo Shiyos, ewaten to sota wáren may-ekan; eg to toy-an.

¹³ Aliwén kowan ko ey pannam-ay ko sota ira emati shi eshom ma dogad, ja angken ayshiy sha i-akan ja tolong, ey si-kayo i mayda-karan.

¹⁴ Nem niman, ta wára met i mebedin na itolong jo, tolongiyo ira sota makasapol, jet no sakey alin akew, ey mesepol jo ngoy tolong, sobalitan shakejo met laeng, say man-inges ma.

¹⁵ Waray naysolat nonta bayag da ja may-pangkep ni inpangolnong ni too nonta tinapay ja kowan sha ey mana, ja kowan to ey, “Sota eshakil i inolnong to, eg simolok, jet sota otik i inolnong to, eg kimolang.”

¹⁶ Nem naka man-iyaman son Apo Shiyos ta intorong tos Tito, jet niman, say toka pengisekit son si-kayo, inges toy wáred nemnem ko.

¹⁷ Aliwén man-imdeng bengat nonta shawat mi son si-katon ondaw shitan, nem mas pay ya masi-met den en manbisita shita kad-an jo. Nem angken bilang enshiy mi inkowan, ondaw ngo eshan da ta piyan ton pasiya ja asen tokejo.

¹⁸ Jet wára day peki-odop mi son si-kato ja agi tayo met laeng shi pamati. Sajay ya too, am-amta ni emin na emati shi emin na ka-ili-ili, tep edaing nga mengikowan ni mapteng nga shamag maypangkep so nen Jesucristo.

¹⁹ Jet aliwén sotan bengat i dag-en to, no diket si-kato pay i shinotokan ira nonta emati shi ka-ili-ili ja kaiten min mengolnong nonta alos sha ja itolong sha shi eshom ma emati. Isonga kadwa mi ni mika pan-eka-ekad ja mengolnong

nonta alos. Sajay i mika pandag-a, say eshakil i mengiredjaw son Apo Jesus, tan say ipa-sas mi ey masi-met kamin ontolong.

²⁰ Inpaki-olop mi si iyay ta eg mi koston waray apil la nemnemen ni too son si-kami ni maypangkep niya ebadeg ga alos ja inegshi-an mi.

²¹ Say pangkep mi, sota koskosto i dag-en mi. Sajay, amta nen Apo Shiyos, nem piyan ko ngon amta-en ni toto.

²² Jet iyay pay i sakey ya agi tayod pamati ja peki-odop mi la son si-kara. Jet sajay ya agi tayod pamati, inon-an miy toka dagdag-a jet masi-met ni olay ya ontolong, angken nganton obda. Agdalo niman ta marinel ma son si-kayo.

²³ No sota maypangkep so nen Tito, si-katoy kadwak ni sajay ya mika dagdag-a ja pansigshan jo. Jet sota ira may-odop da son si-kato, si-karay inbetkag ira nonta emati shi ka-ili-ili. Jet si Cristoy emayshedjaw pangkep nonta shaka dagdag-a.

²⁴ Isonga ipa-sas joy semek jo son si-kara, say asen ni emin na emati shi ka-ili-ili ey agpayso sota mika pengi-tek son si-kayo.

9

¹ Sota maypangkep ni alos ja mika pan-olnonga ja i-akan mi so nonta ira kait tayod pamati ja maligdigat shi Jodia, eg mesepol la isolat ko son si-kayo.

² Amtak ey mapiyan kayon ontolong, jet sotan i naka pengi-tek son si-kayo so ira niya toon emati ja i-Masidonia. Say inkowan ko son si-kara

pangkep son si-kayon i-Akaya, inkowan ko ey angken nonta sakey den tawen ket esagana kayon meki-edos. Jet sotan na si-met jon ontolong, si-katoy engawis ni nemnem ni karakdan shiyay, ja ontolong ngo.

³ Jet sajay iren a-aki tayod pamati, ibetkag ko len mepangdo say may-agpayso ey sota mika pengi-tek son si-kayo, ja esagana kayon meki-edos.

⁴ Sajay i inpasing ko ta baka waray mekidaw den i-Masidonia son si-kak ket no eg kayo pay laeng esagana, maybebaing kami, tan angken si-kayo, ta naksheng den inkowan ko ey waray namnamak son si-kayo, ey esagana kayon ontolong.

⁵ Isonga ninemnem kon mapmapteng emo no mepangdo ira jay den a-aki shi pamati, say olnongen shen mareng sota alos jo ja inkari jo asanak da motok. Say no onmotokak da, esagana ja wara. Nem karejo nemnemen ey kapiditan iyay; say piyan ko, sota nemnem jo ngon mengi-kan, si-kato.

⁶ Iyay koma i nemnemen jo ja arig ni pengi-kan. Sota toon ootik i inmola to, otik ngoy epiten to. Jet sota eshakel i inmola to, asdeg to ngoy epiten to.

⁷ Nem enshiy memidit son si-kayo. Isonga eg kayo koma onkotot pangkep niyay ya alos. Emin sota masi-met ja mengi-kan, nemnemen to no pigay i-akan to jet si-katoy i-akan to. Ta si Apo Shiyos, pipiyan to sota man-imdeng ja mengi-kan.

⁸ Jet si Apo Shiyos, kabaalan ton i-akan i

ebadeg ga kaasi to son si-kayo jet aliwén sota kasapolan jo bengat, no diket esolokan pay. Kabaalan ton mengi-kan ni koskoston kasapolan jo jet sodokan to pay say wára ni olay i i-akan jo so nonta mesepól la metodongan.

⁹ Sotan i kaytoshongan nonta naysolat nonta bayag da ja kowan to ey, “Sota toon maekan so nonta nankebiteg, eg ma-enshi-an; isonga eg ngo mepospos sota pandeka to ni mapteng.” Kowan nonta naysolat.

¹⁰ Jet si Apo Shiyos ja emengi-kan ni botil so nonta ira manmoda, tan emengi-kan ni mekan, si-kato met laeng i peshekel so nonta wára son si-kayo say eshakil ngoy todongan jo. Si-katoy mengi-kan ni olay son si-kayo say waray pesing jon mandeka ni mapteng.

¹¹ Isonga mebedin men asdeg to ni olay i i-akan jo, ta si Apo Shiyos met laeng i maka-amta ni baknangan jo. Jet no maypangkep nonta alos jon ipiyal jo son si-kami, say panbenagan to, eshakil i man-iyaman son Apo Shiyos.

¹² Ta sajay ya tolong nga dag-en jo, aliwén na tolong jo bengat so nonta ira kasapolan ni eshom ma emati, no diket sajay i kabol la esha-kelan ni man-iyaman na pasiya so nen Apo Shiyos.

¹³ Jet sota ira todongan jo, ishayaw shes Apo Shiyos pangkep nonta ebadeg ga alos jon i-akan jo son si-kara, tan so ni eshom pay. Nem aliwén sota kasi-met jon mengi-kan ni tolong bengat i pan-iyamanan sha, no diket man-iyaman pay ira so nen Apo Shiyos, ta sotan i ka-asan to ey joka ipateg sota bilin nen Cristo ja inewat jo.

¹⁴ Jet ishawatan shakejo, tan piyan sha pay

ja asen shakejo, ta sota alos jon in-akan jo son si-kara, si-katoy amta-an sha so ey kaskasshaaw sota kaasi nen Apo Shiyos son si-kayo.

¹⁵ Jet si Apo Shiyos i pan-iyaman tayo, ta enshiy kay-ingesan nonta in-akan ton kaasi son si-katejon too to!

10

Aliwa kamin basta toon abos, nem eg shinotokan shakami nen Apo Shiyos ja manbedin ni apostol

¹⁻² Niman, iyay i ikowan ko so ni eshom son si-kayo shita Korinto ja eg makakosto son si-kak, ja makakowan ey sota aramid ko ket aramid met laeng ni karakdan, ja ekak mepiyal kono. Si-kak si Pablo, nem ekak ipakat i kina-apostol ko son si-kayo, no diket ibabak i bakdang ko ja mekikaasi son si-kayo. Tep mesepol la onoran ko si Cristo ja dododop ni olay i inpasing to so ni totoo. Sota eshom son si-kayo, kowan sha kono ey ekombaba-ak no wára-ak son si-kayo, nem no arawi-ak son si-kayo, embel-at konoy naka pemidin son si-kayo shi solat. Shewaten ko son si-kayo ey manbebawi kayo, say no ondawak da son si-kayo, eg mesepol la ito-to-wák ja pebel-at i pemidin ko son si-kayo.

³ Agpayso ja say kawad-an mi niman, shiya dobong. Nem eg kami manshinel nonta ogadi ni karakdan na too shiya dobong ni pekileban mi so nonta ira makakontra son Cristo.

⁴ Sota singa almas ja mika osala ni pekileban mi son si-kara, aliwen na inges to sota almas

ni tood ja dobong, no diket sota panakabalin nen Apo Shiyos i mika osala. Isonga kamika mengebak ni olay ja meneshal nonta angken nganton singa kaontiped son si-kami.

⁵ Say pangkep mi, ibaba mi sota kowan sha ey matekal, ono etangsit, ja eg makakoston mengamta so nen Apo Shiyos. Piyan min angken sipa, say nemnemen sha bengat, sota piyan nen Cristo, say si Cristoy pati-en sha.

⁶ Jet sota toon memasig, ja eg mebidin, esagana kamin memidin son si-kato. Nem asen mi nin son si-kayo no sipay mematin kosto son Cristo.

⁷ Sigosho say kabol la eg jowak so pati-an, sota kakapoy ni bakdang koy joka nemnemnema. Nem no wára son si-kayo i toka ibilang shorog i bakdang to ey too nen Cristo, mesepol la nemnemen to ey angken si-kami ngo, too shakami nen Cristo ja inges to.

⁸ Nem si-kak, wáray nandasinan ni saad ko. Isonga angken bilang ey wáray edabas ja naka ikowan pangkep niya saad kon in-awat nen Apo Jesus son si-kak, agpayso. Say kowan nen Apo Jesus ey dag-en ko, sota ontolong son si-kayo say onkedsang i pamatiyo, aliwén sota peneshal son si-kayo.

⁹ Jet ekak koston nemnemen jo ey takejoka panta-kota nodta insolat ko la.

¹⁰ Nem wára met son si-kayo i makadedamsis son si-kak, ja kowan sha kono ey, "Si Pablo, makedsang noman i solat to, ja wáray banag to, nem pampamaayan met kari i bakdang to no mison wáred jay, angken sota toka pan-a-sel!" Kowan sha kono.

¹¹ Nem no sipa sotan na toon engikowan niyay da, mesepol la ewatan sha koma ey enshiy na-apilan nonta insolat ko no enshi-ak, tan sota dag-en ko ni kawashak son si-kara. Ta sota insolat ko, ja kowan sha kono ey emena-ta-kot bengat, sotan met laeng i dag-en ko ni kawashak son si-kara!

¹² Aliw'en na mika pan-i-inges i bakdang mi so nonta ira toon kowan sha ey si-karay kamaptengan. Eg mi i-eshom i bakdang mi nodta shaka pesing nga mengi-tek. Ta sotan iren too, enshiy am-amtara! Say shaka pengilokori ni amtara, sota inges sha; isonga kowan sha ey si-karay kamaptengan.

¹³ Nem si-kami, eg mi iba-ngat i dastog, eg mi da-to-an sota obden in-akan nen Apo Shiyos son si-kami. Nem si-kayon i-Korinto i sinekopan niyay ya obda mi.

¹⁴ Wara met i nebeng mi son si-kayo, ta si-kami met i pilmiron dimaw son si-kayo ja engikowan ni mapteng nga shamag maypangkep son Cristo.

¹⁵ Aliw'en kowan mi ey obda mi sota inobda ni eshom, ta enshiy mi kaybiyangan nodtan. Nem shita Korinto, say namnama mi, no onkedsang koma i pamatiyo, mebedin na si-kami mowan may nemnemnemen jo.

¹⁶ Ta piyan min mengitosho pay nonta shamag pangkep so nen Cristo shima dogad ja medabsan i kad-an jo. Jet si-kayo komay mengisekot son si-kami. Ta say obda ja mika idastog, sota obda ja dingka mi, aliw'en sota obda ni eshom.

¹⁷ Nem agpayso noman sota naysolat nonta bayag da, ja kowan to ey, "Sota toon piyan ton

mandastog, say idastog to koma, sota kekosto-i nen Apo Shiyos son si-kara.”

¹⁸ Isonga sota mengisekot shorog ni bakdang to, karejo pati-en; say koskoston pati-en jo koma, sota insagot nen Apo Shiyos.

11

¹⁻² Nem niman, ta ensakit i nemnem ko may-pangkep son si-kayo, sapay koma ta enosan jon itenengan iya ikowan ko, ta singa waray dedamsis ko nodta ikowan ko di son si-kayo. Ta piyan kon isagot nin i bakdang ko son si-kayo. Ebadeg i naka pengisekit son si-kayo, ja inges toy kepengisekit nen Apo Shiyos. May-eshig ey bii kayon enshiy dakin imad-arol so, jet singa intolag takejo ja esaw-en ali nonta sakey ya daki, ja si Cristo.

³ Nem naka manshanag ta baka manbediw i nemnem jo, ja eg jo mala nemnemnemen sota koston joka pansilbi so nen Cristo. Baka may-owapan kayo, ja inges to sota in-olbod so ni oleg so nen Eva, nonta bayag da, jet nay-owapan noman.

⁴ Ta inam-ay met i joka ka-ewis. No waray eshom ma ondaw son si-kayo ja mengitoshon ni apil, ja aliwen inges to sota intoro mi ngo maypangkep so nen Jesus, joka ewata. Masi-met kayon mengewat nonta ispiriton shaka ikowan son si-kayo, anta nga inewat jo la met sota koston Ispirito Santo nen Apo Shiyos nonta inpamatiyo son Cristo. Masi-met kayo pay ya mengewat nonta apil ja kowan sha ey kaysedakan.

⁵ Jet no joka enosi ira ja kowan sha ey kangeto-an konon apostol, anosi jowak koma ngo ni sajay ya ikowan ko. Ta say wáred nemnem ko, angken sipa son si-kara, eg sha-ak et ngo ebaken ni angken ootik.

⁶ Aliwén na matekalak ja man-a-sel, nem am-tak i naka ikokowan. Nem eg mesepol la ikowan ko son si-kayo i itsorak ja too, ta inpalewág kon emin son si-kayo, jet amtayo ey apostol towak nen Cristo.

⁷ Nem baka apil i wáred nemnem jo son si-kak, ja kowan jo ey inbabak i kina-apostol ko, ta enshiy nak siningil son si-kayo nonta intorok sota mapteng nga shamag ja edapo so nen Apo Shiyos. Nem pansigshan joy kabol la ekak dingka-an so nontan.

⁸ Nonta wára-ak son si-kayo ja emengitosho, say inosal kon pilak, sota in-akan ni emati shi eshom ma dogad. Isonga singa tinodisan ko noman ira, say dibshi mangoy pengitoshok son si-kayo.

⁹ Jet nonta wára-ak son si-kayo, enshiy kowan ko ey mengshawak son si-kayo no wáray mese-pol ko. Sota ira a-aki shi pamati ja i-Masidonia, si-kara i engimotok ni mesepol ko nontan. Ta ekak kosto nontan ja wáray mankastos son si-kayo ni kabol ni kompormin mesepol ko. Jet no ondawak da mowan, satan met laeng i dag-en ko.

¹⁰ Ta no bilang ey si-kayoy pengshawan ko ni mesepol ko, enshi may pengi-tek ko ey eg takejo siningil ni inpangitorok son si-kayo. Amtak ey sigoradon inpiyal nen Cristo son si-kak sota

podnon piyan ton maytosho, isonga amtak ngo ey ekak mengmengshaw son si-kayon i-Akaya.

¹¹ Sigosho say kowan jo emo, ekak mengshaw son si-kayo, ta enshiy semek ko son si-kayo. Nem enshi, aliwén sotan i wáred nemnem ko. Amta nen Apo Shiyos ey ensemek takejon emin!

¹² Jet itoloy kon eg mengmengshew son si-kayo say sota etangsit ta totoo ja makakowan ey apostol ngo ira, onsalsheng sota shaka pandastog ja kowan sha ey sota shaka dagdag-a ket inges toy obda mi.

¹³ Sotan iren totoo ket aliwén agpayson apostol ira. Sota obdara, singa obda ni apostol nen Cristo, nem o-owap kari.

¹⁴ Iso gayam ma angken si Satanas, singa anghil ja mismon edapo son Apo Shiyos no sin-arom, nem emengi-o-owap kari.

¹⁵ Isonga aliwén na kaskashaaw no saja ira sinan apostol ja emansilbi son Satanas ket singa emengitosho ni mapteng nga pengonod son Apo Shiyos. Nem say panbenagan sha, epiten sha met laeng sota aramid shen ngaaw.

¹⁶ Ipinshowak iyay son si-kayo. Aliwén jo koma nemnemen ey singa wáray kolkolang ko, ta singa wáray dedamsis ni ikowan ko di. Nem no sotan i wáred nemnem jo, anosi jowak, ta iyay nin i idastog ko, ja inges toy kapandastog ira nonta toon wáred tan.

¹⁷ Say agpayso, sajay ya ikowan ko, aliwén inbilin nen Apo Jesus, no diket ikowan ko iyay ja singa wáray kolkolang ko.

¹⁸ Jet niman, ta eshakil i emengilastog ni kowan sha ey nandasinan sha kono shi eshom,

onoran ko ngo ira ja mandastogak.

¹⁹ No kowan jo ey wáray kolkolang ko, angkena, ta naydowam kayon mengitneng met nonta toon wáray kolkolang to. Ara, nankedaing kayo!

²⁰ Nem joka iba-ngat i onod nonta toon emengila-kad son si-kayo! Say shaka pesing met son si-kayo ket shaka al-ay kokowayo, ireka mayda-da-kam bengat, angstan i shaka pesing son si-kayo, ja angken bebaingan shakejo pay. Jet joka enosi ira!

²¹ No sotan i kowan jo ey itsora ni apostol nen Cristo, agpayso sota kowan sha ey ekapoyak, ta ekak kabaalan na dag-en sota shaka dagdag-a son si-kayo!

Ikowan ko mowan ey si-kak, singa wáray kolkolang ko, nem mesepol ngon mandastogak. No sota eshom ket etoled iren idastog sota kowan sha ey wáray nandasinan sha, mebedin ngon etoleshak ja mandastog ni inges nonta kowan sha.

²² Isonga no kowan sha ey Hodiyo ira, angken si-kak, Hodiyo sak ngo met. No kowan sha ey poli ira nonta sigod ja too nen Apo Shiyos, poli sha-ak ngo. No kowan sha ey apo ira da nen Abraham, ja mekitewid kono nonta kari nen Apo Shiyos, angken si-kak, apo towak ngo.

²³ Singa wáray angaw ko ni sajay ya naka pan-ikowan, nem angkena. Itoloy ko et ja ikowan. No kowan sha ey ireka emansilbi so nen Cristo, mas pay ya naka mansilbi, ta eshakel i digat ko nem say si-kara. Ebadbadeg ngo eshan i obdak nem say si-kara, tan eminshakelak pay

ja naybalod nem say si-kara. Jet eminshakel pay ya sinepsepdad sha-ak nonta toon naykontra son si-kak, tan eminshakel pay ya singa ngannganin meteyak.

²⁴ Jet sota ira kait kon Hodiyo, emindima ja sinepdad sha-ak ni tedon polo tan siyam.

²⁵ Emintedo ja sinepdad sha-ak ni sowan; pinsak ja kineskespigan sha-ak ni bato. Emintedon ena-ned sota nandoganan kon barko jet esareyak mala. Jet nonta pinsak ka esareyan ko, sandabi tan san-akew ja nannangoyak shima baybay.

²⁶ Asdeg toy inek-ekad kon dogad, jet eshakel pay i dilikaron dina-kaman ko: waray dayos, wara iray tolisan, jet angken sota ira kait kon Hodiyo, kataktakot i itsora sha no sin-arom. Angken sota ira aliwen Hodiyo, iso met laeng ja kataktakot ira no sin-arom. Jet angken pay shima siyodad, dilikaro-ak ja man-ek-ekad, angken pay shima shonshontog. Dilikaro-ak ja mandokan shima barko. Jet angken sota ira kowan sha ey a-aki shi pamati, ja o-owap kari, kataktakot i itsora sha.

²⁷ Naka emebdey ya pasiya ni sajay ya obdak, jet eminshakel la ekak pay maka-ogip. Eminshakel la na-ag-agangak tep enshin polos i kenen ko tan na-kewak pay ni shanom. Naka mekmektel ta enshiy koston barok.

²⁸ Jet aliwen sotan bengat, no diket ina-akew ja naka nemnemnemen pasiya sota ira emati shi emin na dogad, no kas-anoy kasesaad sha.

²⁹ No wara iray ekapoy i pamati to, naka isakit ira, jet no waray eshom ma toon panbesol so nonta kait kon emati, singa naka onpetang.

³⁰ Mesepol la mandastogak, nem say indastog ko la, sota mengipa-amta ni kakapoy niya bakdang ko.

³¹ Jet si Apo Shiyos ja Ama nen Apo Jesus, ja shedjawen ni emin na totoo ingkatod ingka, si-katoy maka-amta ey si-kak, agpayso iya inkowan ko la, ekak dina-bagan.

³² Iyay pay i ikowan kon dina-kaman ko. Shi Damasko, sota gobinarol shiman ja insaad nen Ari Aritas, inpabantay to ni solsharo sota siyodad say a-shelen sha-ak.

³³ Nem waray tood man ja engi-iyen son si-kak shi baskit jet inoy-oy sha-ak nodta tawa ja naypetek nodta alad ja dimikmot so nonta siyodad. Isonga dinisi-an ko sota istay kowan sha ey mengkel son si-kak.

12

¹ No sota maypangkep ni pandastog, enshiy to i-akan na panmaptengan ko. Nem mesepol la itoloy kon ikowan sota epaspasemak son si-kak. Niman, sodsoren ko sota inpa-sas nen Apo Jesus, tan inpa-amta to son si-kak.

² Waray amtak ka toon emati so nen Cristo, jet nonta epalabas den sampolo tan epat ta tawen, indaw nen Apo Shiyos sotan na too shi mismon dangit. Jet ekak amta no mismon sota kabakbakdang nontan na too, ono aliwen mismo ja bakdang to i dimaw shiman, nem si Apo Shiyos, amta to.

³ Sajay ya too, amtak ey agpayson dimaw shima kad-an nen Apo Shiyos, nem say ekak

amta, no mismon sota bakdang to, ono enshi. Si Apo Shiyos bengat i maka-amta niyay.

⁴ Jet shiman, waray intenengan ton esel ja eg mebedin na mayteshos shi esel ni si-katejon too, asan naykowan son si-kato ey parit i pengi-odog to.

⁵ Jet sajay ya too, waray mebedin na idastog ko pangkep son si-kato. Nem no si-kak ka mismo, enshiy eshom ma nak idastog nem eg sota inkowan ko la, ja emengipa-amta ni kakapoy ni bakdang ko.

⁶ Nem no istay piyan kon mandastog, aliwen pampamaayan, ta agpayson eshakel i koston dingdingkak. Nem ekak ma mandastog, ta baka et ey pasiya-en ni totoo i shyaw son si-kak. Piyan kon say nemnemen sha koma ja ogadik, sota asen sha son si-kak, tan sota itenengan shen ikowan ko.

⁷ Eshakel la pasiyy inpa-amta nen Apo Shiyos son si-kak, nem say inpasing to say ekak ikayang shorog i bakdang ko, waray inpalobos ton digat ni bakdang ko ja naka da-da-kami, ja singa waray tebek ni olay shiya daman ko. Singa waray toka ibetbetkag ja anghil nen Satanas ja emenakit son si-kak, say ekak ingato i bakdang ko shorog.

⁸ Jet emintedo ja nanshawatak so nen Apo Jesus ey a-kalen to koma iyay ya naka da-da-kami.

⁹ Nem eg to ingkal. Say songbat to et, kowan to ey, "Sota kaasik son si-kam, on-anay ja pekedsang son si-kam. Ta sota panakabalin kon mengaasi, agdalon naka i-akan so nonta ekapoy." Kowan nen Apo Jesus. Isonga naka

man-imdeng nga pasiya ja mengenos niyay ya digat ko, say sota panakabalin nen Cristo ja toka penodong, ipakat to ngo son si-kak. Jet angken ekapoyak, si-katoy naka idastog.

¹⁰ Isonga niman ma, napnekak; angken ekapoyak, enosan ko. Jet enosan ko pay no bebaingan sha-ak, ono pedigaten sha-ak, ono angken nganton digat i da-kaman ko. Ta amtak ey emin iyay ja emedegdeka son si-kak, pangkep so nen Cristo ja naka pansilbi-i. Amtak ey no timpon ikapoy ko, si Cristo met laeng i mengi-kan ni kedsang ko.

¹¹ Si-kayo met i emilit son si-kak, isonga sajay i inkokowan ko la; nakol ni singa wára may kolkolang ko. Istay si-kayo komay mengikowan ni kamapteng ko, say aliwén na si-kak koma et ngo mowan i mengisodat ni maypangkep ni bakdang ko. Ta si-kak, amtak ey angken ootik bengat, eg sha-ak ebaken nonta kowan sha ey kangeto-an konon apostol shitan, angken bilang ey agpayso sota kowan sha ey enshiy silbik kono, ta enshi ngo met kariy silbira!

¹² Say ka-asan to ey koskoston apostolak, wára met i koston dingkak ja kaskashaaw tan milagro nonta kawashak son si-kayo, tan sakey pay, inenosan ko i eshom son si-kayo ja makakontra son si-kak.

¹³ Jet enshi met i nak inpabor so ni emati shima eshom ma dogad ja ekak ngo inpabor son si-kayo. Say amtak bengat ja singa inpabor ko son si-kara, sota inpangados sha ni kasapolan ko. Jet pakawani jowak ni sajay ya nankolongan ko, ta eg takejo ngo inpangados!

14 Jet sajay ya maykatdon idaw ko la son si-kayo, ekak met laeng koston mankastos kayo pangkep son si-kak. Ta aliwén sota pilak jo i piyan ko, no diket mismon si-kayo i piyan ko. Ta say kay-eshigan to, aliwén na sota ira a-anak i mengi-kan ni kasapolan nen amesha, no diket sota amesha i mengi-kan ni kasapolan ni annak to.

15 Aliwén entapik ja kastosen i nganton wára son si-kak, tan mebedin pay ya osalen ko iya bakdang ko, ja ontolong son si-kayo. Jet no bilang ey sajay i kaba-deg ni semek ko son si-kayo, eg jowak ngo ngata sesmeken?

16 Mebedin na imanogot kayo nonta inkowan ko la, ey enshiy kastos jo ni kawashak shitan. Nem say kowan kono ni eshom son si-kayo, sotan i intapang ko say may-owapan kayo jet say si-kak i onoren jo.

17 Nem enshi met i nak inolbod son si-kayo nonta waray inbetkag ko la ja ondaw son si-kayo. Nemnem jo kari.

18 Si-kak i mismon engikowan so nen Tito ey ondaw son si-kayo, jet engibetkagak pay ni nay-olop son si-kato ja agi shi pamati. Jet enshi met i amtak ja sha inda son si-kayo. Nan-inges met i pangkep mi son si-kayo, ta nan-inges kamin emengonod son Cristo.

19 Sigosho say wára mowan shi nemnem jo, kowan jo ey kamika mandeson son si-kayo pangkep nonta inkowan jon nankolongan mi. Enshi, si Apo Shiyos bengat i maka-amta no kostoy dingka mi, ono enshi. Jet amta to ey wára kami son Cristo. Emin iyay ya inkowan mi la son

si-kayon a-aki mi shi pamati, panmaptengan jo met.

²⁰ Ta naka manshanag ta baka et ey no onmotokak da son si-kayo, eg jo pay laeng tinongpal sota naka namnama-a ja dag-en jo. Nakol ni ekak dag-en sota joka namnama-a, ja enosan takejo. No onmotokak da, baka eg jo pay laeng binediwan sota sigod ja ogadiyo, ja kayoka manbabakal, waray apal jo ni kait jo, waray mabonget, waray ma-isew, waray mayamjam, waray masomang, waray edastog. Baka ngalawngaw kayo, ja enshiy olnos jo.

²¹ Naka manshanag ta baka no ondawak da son si-kayo, mandeshingitak pangkep so nonta ira eshakil la nanbasol ja kait jo nontan da, ja eg pay laeng nanbebawi. Baka ingkato pay laeng niman ket ireka pay laeng ememii ono wara pay laeng son si-kara sota eshom ma kilasin edogit ta aramid, nakol ni say pedekna nen Apo Shiyos son si-kak, ibaing takejo.

13

¹ Sajay i maykatdon dawán ko la son si-kayo, jet no ondawak da, i-anam koy pemidin nodta sigod ja wared bilin nen Apo Shiyos nonta bayag da, ja kowan to ey, “No waray kowan ni too ey nanbasol, mesepol la waray showa ono tedon onpaneknek so, asan joka pati-a.”

² Nonta naykapinshowa ja indaw ko shita kad-an jo, sota inbanshaan ko so nonta nanbasol nontan, tan si-kayon eshom, si-kato met laeng; ekak bediwan. Ta say inbanshaan ko met nontan son si-kayo, kowan ko ey no ondawak mowan da,

shosa-en kon emin ira sota nanbasol, enshiy nak pesinsiya-an son si-kara. Jet angken niman na enshi-ak son si-kayo, sotan met laeng i isolat kod jay.

³ Ipa-sas ko son si-kayo ey podnon si Cristo i enotok son si-kak ja apostol, ta sotan konoy piyan jo. Jet eg jowak koma damsisen, ta aliwén na ekapoy si Cristo ja memidin son si-kayo. Mebedin ton ipa-sas i panakabalin to son si-kayo.

⁴ Agpayso ja nonta naydansa shi koros, ekapoy ja inges tayo, nem nonta nan-ongal, Manakabalin ma ja inges tos Apo Shiyos. Jet angken si-kamin apostol, ekapoy kami ja inges tos Jesus nonta wared biyag pay laeng; nem makedsang i pemidin mi son si-kayo, ta nayda-kam kami nonta panakabalin nen Jesus ja wared dangit.

⁵ Piyan jo konon asen no si Cristo ket wára son si-kak. Nem say kowan ko son si-kayo, asas jo shorog i ogadiyo, no wára kayo pay laeng son Cristo ja emati. Ta say ekak amta, no si-kayo ket aliwén agpayson emati kayo. Istay mebedin komen idasin jo no si Cristo, wára son si-kayo.

⁶ Jet no dag-en jo iyyay, naka namnama-a ey amta-en jo met laeng ey agpayson wares Cristo son si-kami.

⁷ Say shawat mi son Apo Shiyos pangkep son si-kayo, onmapteng koma i ogadiyo. Say kabol la sajay i shawat mi pangkep son si-kayo, aliwén say ikowan ni totoo ey “Siya, agpayson apostol noman si Pablo ta mapteng i ogadi noman ira nima inewis ton emati!” Enshi, sajay i shawat mi ta piyan mi bengat sota panmaptengan jo. No onmapteng i ogadiyo, enshiy kabol la keshosa-an jo,

nakol ni toy-an shakami pay laeng ni eshom, ta kowan sha ey enshiy mi inpa-sas sa panakabalin min menosa ja ketekotan sha. Nem say kowan mi, angken damsisen shakami, no onmapteng kayo et.

⁸⁻⁹ Jet say shawat mi son Apo Shiyos, piyan min onmapteng i ogadiyo; eg mi nemnemen ey eg kayo koma manbebawi say ipa-sas miy panakabalin nen Apo Shiyos ja wara son si-kami ja menosa son si-kayo. Enshi, eg mebedin na piyan min medeka sota maykontra nodta podnon toro nen Apo Shiyos. Say piyan mi, sota podno ni olay i medeka. Mas pay komay imdeng mi no si-kamiy ekapoy, ey si-kayo ngoy makedsang.

¹⁰ Insolat ko iyay niman na ka-enshik pay laeng son si-kayo, ta piyan kon no onmotokak da, eg mesepol la ida-karan takejo ni bilin. Ta sota saad kon in-awat nen Apo Jesus, say kowan to ey osalan ko so, sota ontolong son si-kayo say onkedsang i pamatiyo; eg to koston sheshalen takejo.

¹¹ Jet siya, niman ma, si-kayon a-aki shi pamati, pan-imdeng kayo. Pannemnem kayo say man-i-inawatan kayo. Patiyo sota inbilin ko son si-kayo. Pansaksakey joy nemnem jo say waray olnos jo. Jet no sajay i dag-en jo, si Apo Shiyos ja kedepo-i ni semek tan talna, si-kato i mewesha pay son si-kayo ni olay.

¹² Ipa-sas joy semek jo shi sakey tan sakey son si-kayo.

¹³ Jet emin ira sota ematid ja ilin kawad-an ko, inkowan sha ey pekisodat kod jay i semek sha

son si-kayo.

¹⁴ Jet say shawat ko son Apo Shiyos, sota kaasi nen Apo Jesucristo, tan sota semek nen Apo Shiyos, ja wára son si-kayon emin, sapay koma ta si-katoy ma-shoman, tan kasta met sota inpankagait jo ta wára sota Ispirito Santo nen Apo Shiyos so ni sakey tan sakey son si-kayo.

**Dibshon Mengi-kan Ni Pansigshan
Ibaloi: Dibshon Mengi-kan Ni Pansigshan (New
Testament)**

copyright © 1978 Wycliffe Bible Translators, Inc.

Language: Ibaloi

Contributor: Wycliffe Bible Translators, Inc.

All rights reserved.

2025-05-03

PDF generated using Haiola and XeLaTeX on 2 May 2025 from source files
dated 3 May 2025

6f85e932-8eee-5911-b890-a31a1da75d8c